

ԱՐԵՎԵԼՅԱՆ ՀԱՅԱՍՏԱՆԻ ՊՐՈԼԵՏԱՐԻԱՏԻ ԴԱՍԱԿԱՐԳԱՅԻՆ ՊԱՅՔԱՐԸ
1890-ԱԿԱՆ ԹՎԱԿԱՆՆԵՐԻՆ

ՎԱՋԵ ՀՈՎԱԿԻՄՅԱՆ

XIX դ. վերջին քառորդին կապիտալիստական հարաբերությունների զարգացումը որոշակի փոփոխություններ մտցրեց Արևելյան Հայաստանի բնակչության սոցիալական կառուցվածքում: Գյուղացիության քայքայմանն ու շերտավորմանը զուգընթաց ձևավորվում էր կապիտալիստական հասարակարգի գլխավոր արտադրողական ուժը՝ պրոլետարիատը¹, որը XIX դարավերջին որոշակի թիվ էր կազմում: 1900 թ. պաշտոնական տվյալներով Երևանի նահանգում աշխատում էր ավելի քան 8200 բանվոր², Եթե այս թվին ավելացնենք նաև Արավերդու և Ղափանի (սրանք գտնվում էին Երևանի նահանգից դուրս) պղնձարդյունաբերության մեջ աշխատող մոտ վեց հազար բանվորներին³ և Կարսի մարզի հազար բանվորներին⁴, ապա բանվորների թիվը կանցնի 15 հազարից: Եթե դրանից անդամ հանենք ջրաղացներում աշխատողների թիվը (մոտ երեք հազար)⁵, ապա վերոհիշյալ ժամանակաշրջանում Արևելյան Հայաստանի բանվորների թիվը կանցնի տասը հազարից:

Հայ բուրժուական ազգի ձևավորման գլխավոր առանձնահատկություններից մեկն այն էր, որ հայ բուրժուազիայի և արդյունաբերական պրոլետարիատի գերակշռող մասը պատմական մի շարք հանգամանքների բերումով ձևավորվեց և սկսեց գործել Արևելյան Հայաստանի սահմաններից դուրս: Երկրամասի բազմազգ բուրժուազիայի շրջանում ամենից հաստատուն դիրքերը գրավել էր տնտեսապես ուժեղ հայ բուրժուազիան⁶, ինչ վերաբերում է հայ պրոլետարիատին, ապա վերջինս նույնպես մեծ թիվ էր կազմում Անդրկովկասի պրոլետարիատի շարքերում: Այսպես, օրինակ, 1897 թ. Բաքվի նավթարդյունաբերության մեջ աշխատող բանվորների 29%-ը հայեր էին⁷: Զգալի թվով հայեր էին աշխատում Թիֆլիսի ծխախոտի, կոշիկի և այլ գործարաններում, գլխավոր երկաթուղային արհեստանոցներում, Բաթումի գործարաններում և այլուր: XIX դ. վերջին Վրաստանի բանվոր դասակարգի մոտ 35%-ը կազմում էին հայ բանվորները⁸:

Արևելյան Հայաստանի պրոլետարիատն իր ազգային կազմով միատարր չէր: Նրա շարքերում կային ադրբեջանցիներ և ռուսներ, վրացիներ և ուկրաինացիներ, հույներ, պարսիկներ և այլն: Բանվորները դաժան շահագործման էին ենթարկվում, աշխատում օրական 12—14 ժամ և ավելի, մեծ ուշացումներ

¹ 1890-ական թվականների արևելահայ բանվորական շարժումների մասին տե՛ս Վ. Ավետիսյան, Մի էջ Հայաստանի բանվորական շարժումների պատմությունից, Երևան, 1962:

² «Обзор Эриванской губернии за 1900 г.», с. 8.

³ «Հայաստանի կոմունիստական պարտիայի պատմության ուղագծեր», Երևան, 1963, էջ 13:

⁴ ՄԱԿԿ Կենտկոմին աղբյուր մարքսիզմ-լենինիզմի ինստիտուտի վրացական մասնաճյուղի արխիվ, ֆ. 2914, ց. 1, գ. 507, թ. 6, տե՛ս նաև Խ. Բարսեղյան, Մարքսիզմի տարածումը Հայաստանում, հ. 1, Երևան, 1967, էջ 46:

⁵ М. Адонц, Экономическое развитие Восточной Армении, Ереван, 1957, с. 450.

⁶ «Очерки истории коммунистических организаций Закавказья», ч. 1, Тбилиси, 1968, с. 19.

⁷ В. Парсаян, История армянского народа (1801—1900), Ереван, 1972, с. 265.

⁸ Э. Хоштария, Очерки социально-экономической истории Грузии, Тбилиси, 1974, с. 195.

րով ստանում առանց այն էլ շնչին աշխատավարձը, գտնվում կենցաղային անմխիթար պայմաններում:

Անտանելի ծանր էր Ալավերդու և Ղափանի պղնձաձուլական գործարանների, երկաթուղու շինարարության, Կողբի աղահանքերի և մյուս վայրերի ու ձևնարկությունների բանվորների դրուժյունը: Ահա թե ինչ է գրում Կողբի աղահանքերի մասին «Մուրճ» ամսագիրը. «Արշալույսը դեռ չբացված մշակները կալում ու պատրաստ խմբավորված էին լինում աղահանքի մոտ, յուրաքանչյուրը իր օրվա հացը մեջքին կապած «տեղ աստված» կանչելով մտնում էին որջերից ներս և սկսում կատարյալ խլուրդային աշխատանք, չիմանալով ինչ հանկարծահաս պտանգի կարող են ենթարկվել: Աշխատում էին ձեռքի ճուսգների լուսավորության ներքո: Դուրս գալով այդ խավար խորխորատներից արևի մայր մտնելուց հետո, երկնքի վրա սփռած վերջալույսը նրանց համար կարմիր առավոտ էր թվում»⁹:

Բանվորներից շատերը, որ դեռ երեկ էին թողել գյուղական խավարի թագավորությունը, պարզորոշ չէին պատկերացնում իրենց նոր տեղն ու դերը, չգիտեին իրենց պայմանների բարելավման ձևերն ու միջոցները: Խոսելով Կարս քաղաքի բանվորների թշվառ վիճակի մասին, «Մուրճ» ամսագիրը նշում էր, որ դրա պատճառներից մեկն էլ այն է, որ բանվորները միավորված չեն և որ Էնդհանուր շահերի պաշտպանության համար միասնաբար չեն հանդես գալիս¹⁰:

Բանվորական շարժման սկզբնավորումը և հասունացումը սերտորեն կապված էին երկրի սոցիալ-տնտեսական կյանքի զարգացման հետ: Կապիտալիստական շահագործմանը զուգընթաց աստիճանաբար ձևավորվում էր նաև բանվորների դասակարգային գիտակցությունը, սկիզբ էր դրվում բանվորական շարժմանը, որը 1890-ական թվականներին Անդրկովկասում նկատելի աշխուժացում ապրեց: Կովկասի կառավարչապետ Գոլիցինը Նիկոլայ II-ին ուղղած զեկուցագրում նշում էր. «Անդրկովկասում բանվորական հարցը ավելի ու ավելի է բորբոքվում՝ ապագայում սպառնալով խոշոր բարդություններ»¹¹: Բաբլի, Թիֆլիսի և Բաթումի բանվորական գործադուլներին ակտիվ մասնակցում էին նաև տեղի հայ բանվորները: Համատեղ պայքարի ընթացքում ամրանում էր երկրամասի բաղմազգ պրոլետարիատի ինտերնացիոնալ միասնությունը:

Մինչ XIX դ. 90-ական թվականներն Արևելյան Հայաստանում եղել են առանձին բանվորական ելույթներ, սակայն դրանք տարերային պոռթկումներ էին, բանվորական շարժման լոկ նախաքայլեր: Դա այն ժամանակաշրջանն էր, երբ նոր էր կազմավորվում արևելահայ պրոլետարիատը: Այդպիսին էին, օրինակ, 1864 թ. Ալավերդու պղնձաձուլական գործարանի բանվորների գործադուլը¹², 1860—1870-ական թվականներին Սուրմալուի գավառի Կողբի աղահանքերի բանվորական ելույթները¹³: Այսուհանդերձ, Արևելյան Հայաստանի պրոլետարիատի դասակարգային պայքարի՝ որպես հասարակական կյանքի նոր, առաջնորդ ուժի պատմության պարբերացման սկիզբը համարվում է անցյալ դարավերջի վերջին տասնամյակը: Միայն կապիտալիզմը կարող էր ծնել իր գերեզմանափորին՝ բանվոր դասակարգին, հետևաբար և բանվորական շարժումը: XIX դ. 90-ական թվականներին արևելահայ պրոլետարիատի ելույթները համեմատաբար հաճախակի են դառնում, որոնց վրա ինչ որ չափով սկսում է զգացվել երկրամասի արդյունաբերական կենտրոնների բանվորական շարժումների ազդեցությունը: 1895 թ. հուլիսին գործադուլ են հայտարարում

⁹ «Մուրճ», 1896, № 2:

¹⁰ Նույն տեղում, 1890, № 1:

¹¹ Центральный Государственный исторический архив Груз. ССР (այսուհետև՝ ЦГИА Груз. ССР.), ф. 12, оп. 13, д. 224, л. 234.

¹² О. Туманян, Экономическое развитие Армении, ч. 1, Ереван, 1954, с. 182.

¹³ Վ. Պարսամյան, նշվ. աշխ., էջ 335—336:

Ալեքսանդրապոլի տպարաններից մեկի բանվորները: «Ամսի 25-ին Մալխասյանի տպարանի բոլոր բանվորները գործադուլ էին արել. գործադուլի պատճառը,— կարգում ենք «Մշակ» թերթում,— ոտճիկի քլությունը և անկանոն վճարելն է: Ինչպես ասում են, բանվորները ուր հարկն է բողոք են տալու, որպեսզի իրենց հասանելիք օրավարձը ստանան: Այդ տպարանում բանվորները ստանում են ամսական 3—12 ռուբլի: Օրական բանում են 14—16 ժամ»¹⁴:

Անցյալ դարավերջի 90-ական թվականներին Արևելյան Հայաստանում ծավալված ամենամեծ շինարարությունը Թիֆլիս-Ալեքսանդրապոլ-Կարս երկաթուղու շինարարությունն էր՝ թե՛ շինարարական աշխատանքների ծավալով, թե՛ նյութական միջոցների ներդրմամբ ու երկրի տնտեսական զարգացման համար ունեցած նշանակությունով և թե՛ այդտեղ կենտրոնացած բանվորական ուժի առումով: «Մշակ» թերթի տվյալների համաձայն, այդ երկաթգծի շինարարության վրա աշխատում էին շուրջ 10 հազար բանվոր¹⁵, Ընդհանրապես Արևելյան Հայաստանի բանվորական շարժման վրա իր կնիքն էր դնում այն հանգամանքը, որ փոքր խմբերով ցրված լինելով մանր ձեռնարկություններում՝ բանվորները կենտրոնացված ուժ չէին ներկայացնում: Բացառություն էին կազմում պղնձարդյունաբերության գործարանները և վերոհիշյալ երկաթգծի շինարարությունը: Ուստի պատահական չէ, որ բանվորական առաջին ելույթներն ալյուտեղ համեմատաբար առավել վառ դրսևորվեցին:

Թիֆլիս-Կարս երկաթուղու շինարարության բանվորներն անշափ տուժում էին կապալառուների և ենթակապալառուների կամայականություններից ու անօրինականություններից: Իրենց կատարած աշխատանքի դիմաց նրանք շատ ցածր էին վարձատրվում, հաճախ մեծ ուշացումներով էին ստանում աշխատավարձը: Թիֆլիսի երկաթուղային գլխավոր արհեստանոցների և դեպոյի բանվորների ելույթների ազդեցության տակ Թիֆլիս-Կարս երկաթուղու շինարարության Ախթալայի, Զամալուի և Կարսի տեղամասերի հարյուրավոր բանվորներ իրենց կենսական շահերի պաշտպանության համար գործադուլների են դիմում, որոնք ճիշդիւ համար անմիջապես գործի էր անցնում ոստիկանությունը¹⁶:

Պալքարի առաջին ազդանշանը տվեցին Ախթալայի տեղամասի բանվորները: Կովկասի կառավարչապետին Թիֆլիսի նահանգապետի հասցեագրած զեկուցագրից տեղեկանում ենք, որ 1896 թ. ապրիլի 8-ին մոտ 200 բանվոր գործադուլ են անում և կապալառուից պահանջում անմիջապես վճարել իրենց աշխատավարձը: Բայց ինչպես վկայում է արխիվային փաստաթուղթը, «ոստիկանական միջոցներով կարգը վերականգնվում է»¹⁷: Նոր բարդություններից խուսափելու նպատակով կապալառուն սկսում է վճարել բանվորների մի մասի աշխատավարձը: Սակայն տեղեկանալով, որ ոչ բոլորն են ստանալու աշխատավարձ, տարբեր ազգությունների պատկանող մոտ 400 բանվոր ապրիլի 15-ին նորից են հավաքվում գրասենյակի մոտ: Մահակներով զինված նրանք հաքձակվում են ոստիկանների վրա, խլում նրանց մոտ եղած զենքը: Վերջիններս դիմում են փախուստի: Սակայն բանվորների դեմ շուտով ոստիկանական նոր ուժեր են ուղարկվում: Առավել ակտիվություն հանդես բերած 8 բանվոր ձերբակալվում և դատի են տրվում¹⁸: Վերահիշյալ հուլիսների և դրանց հետևանքների մասին ժամանակի հայ պարբերական մամուլի օրգաններից մեկը՝ «Արձագանք» թերթը, գրում էր. «Կարս-Սրեանյան երկաթուղու բանվորներին փողը բաժանվեց, սակայն ահագին կոիվներից հետո, որ և մի քանի մարդու վիրավորեցին և մոտ 10 մարդ էլ բանտարկվեց, որովհետև ինչպես լսում ենք, բանվորներին վճարելիք փողերը սկզբում չեն կամեցել լրիվ

¹⁴ «Մշակ», 1895, № 88:

¹⁵ Նույն տեղում, 1896, № 90:

¹⁶ Վ. Ավետիսյան, Մի էջ Հայաստանի բանվորական շարժումների պատմությունից, տե՛ս նաև ЦГИА Гruz. ССР, ф. 12, оп. 1, д. 2343, оп. 16, д. 9, 32, ф. 313, оп. 1, д. 5:

¹⁷ ЦГИА Гruz. ССР, ф. 12, оп. 16, д. 9, л. 1.

¹⁸ Վ. Ավետիսյան, նշվ. աշխ., էջ 29—32:

տալի, Խեղճ բանվորներին այնքան շարշարեցին՝ մի քանի անգամ Թիֆլիս և այլուր քաշ տալով, որ եթե հաշվենք՝ հազիվ թե օրավարձը 10 կ. նստի»¹⁹։

Ախթալայի տեղամասի բանվորներին ելույթը սթափեցրեց տեղական իշխանություններին և երկաթուղու շինարարության ղեկավարությանը։ Այն միաժամանակ ոգեշնչող նշանակություն ունեցավ հարևան տեղամասերի բանվորների համար։ Այսպես, օրինակ, 1896 թ. օգոստոսի 11-ին ըմբոստացան Ղարաբաղի, իսկ դեկտեմբերի 3—7-ը՝ Ջամալուի տեղամասերի բանվորները²⁰։ Ուշագրավ են հատկապես Ջամալուի տեղամասի բանվորական հուզումները, որոնք լայն արձագանք գտան։ Այլևս չկարողանալով տանել կապալառու Դեմոսիի կամալականությունները, բանվորները թողնում են աշխատանքը և մոտ 300 հոգով ուղղվում դեպի գրասենյակ։ Այնուհետև դեպքերը զարգանում են համարյա նույն արագությամբ ու ընթացքով, ինչպես որ Ախթալայում։ Միակ տարբերությունը լինում է այն, որ այստեղ կազակները կրակում են ոչ թե օդում, այլ բանվորների վրա, որի հետևանքով երեք հոգի վիրավորվում են։ Կովկասի կառավարչապետին ուղղած հեռագրում խոսելով բանվորական այդ «անկարգությունների» մասին, Սրեանի նահանգապետն անգամ ստիպված էր ընդունել, որ բանվորները պաշարել են Դեմոսիի գրասենյակը, որովհետև երկար ժամանակ խաբված են եղել խոստումներով և օգոստոս ամսվա սկզբից աշխատավարձ չեն ստացել²¹։ Ալեքսանդրապոլի գավառապետն իր գեկուցագրում այդ նույն կապալառուին մեղադրում էր կամալականության մեջ, որը հաշվի չի նստում «բանվորների օրինական շահերի հետ»²²։ Սակայն դժվար չէ բնութագրել նաև նման խոսքերի հեղինակներին, որոնք կապալառուին պատժելու փոխարեն շտապում են Ջամալու ուղարկել կազակների ջոկատ։

Մի քանի օր տևած պայքարի շնորհիվ բանվորները, ի վերջո, հասնում են իրենց արդարացի պահանջի բավարարմանը։ Ուշագրավ է, որ բանվորական այս ելույթի մասին տեղեկացվում է անգամ Նիկոլայ II-ը։ 1890—1900 թթ. ընթացքում Ռուսաստանում տեղի ունեցած «բանվորական անկարգություններին» վերաբերյալ կայսրին ներկայացրած ոստիկանության ղեկավարտանքների գեկուցագրում, որտեղ, անշուշտ, արձանագրված են առավել աչքի ընկած ելույթները, 1896 թ. վերաբերող բաժնում (ի դեպ, Ռուսաստանում այդ թվականին եղել է նման 43 ելույթ)²³ հիշատակվում է նաև Թիֆլիս-Կարս երկաթուղու շինարարության Ջամալուի տեղամասի բանվորների դեկտեմբերյան ելույթը²⁴։

Նույն հոդի վրա բանվորական հուզումներն ավելի բոսեն են դրսևորում 1897 թ. հոկտեմբերին՝ Կարսում (երկաթգծի շինարարության 5-րդ տեղամասում)²⁵։ Աշխատավարձը ժամանակին և լրիվ չստանալու կապակցությամբ բանվորները հաճախ էին դիմել իշխանություններին, սակայն անարդյուն։ Օգտուրվելով Կովկասի կառավարչապետ Գուլիցինի՝ Կարսում գտնվելուց, նրանք գրավոր բողոք են ներկայացնում նաև նրան²⁶։

Հոկտեմբերին բանվորական հուզումներն ավելի լայն ծավալ են ընդունում։ Խուսափելով իրենց համար անցանկալի հետևանքներից, կապալառուները դիմում են փախուստի՝ առանց բանվորների հետ վերջնահաշիվ կատարելու։ Հոկտեմբերի 24-ին մոտ 250 բանվորներ գործադուլ են անում և իրենց հասանելիք գումարը ստանալու պահանջով ներկայանում շինարարության տե-

19 «Արձագանք», 1896, № 50։

20 Վ. Ավետիսյան, նշվ. աշխ., էջ 33—37։

21 ЦГИА Груз. ССР, ф. 12, оп. 16, д. 9, л. 10.

22 Նույն տեղում, № 18։

23 Центральный государственный архив Октябрьской революции, ф. ДП, 3-е делопроизводство, 1900 г., д. 1897, л. 314.

24 Նույն տեղում, № 202։

25 Վ. Ավետիսյան, նշվ. աշխ., էջ 38—40։

26 ЦГИА Груз. ССР, ф. 313, оп. 1, д. 5 л. 20.

ղամասի պետին: «Իր անձը բռնությունից պաշտպանելու» խնդրանքով վերջինս դիմում է Կարսի նահանգապետին²⁷, ժամանում են ոստիկանական լրացուցիչ ուժեր, որոնց հետ ընդհարման ժամանակ մի քանի բանվորներ ձերբակալվում են²⁸։ Կարսի բանվորների պայքարը դրանով չի ավարտվում։ Շատ շուտով, մի քանի հարյուր բանվորներ թողնում են աշխատանքը և մեկնում Թիֆլիս։ Նրանք կազմակերպված ներկայանում են երկաթուղու շինարարության վարչության, ապա ուղղվում Կովկասի կառավարչապետի պալատ։ Բանվորների կողմից բողոքի ելքը մեծ տպավորություն է գործում։ Մամուլում հրապարակումների շնորհիվ այդ լուրը տարածվում է երկրամասի շատ անկյուններում²⁹։ Կարսի տեղամասի բանվորները համառ պայքարով, ի վերջո, հասնում իրենց արդարացի պահանջների բավարարմանը։

Գործի ոչ ճիշտ կազմակերպման, շինարարության վարչության ու կապալառուների ճնշումների և կամայականությունների հետևանքով բանվորական ընդվզումներ ու դժգոհություններ էին դիտվում նաև շինարարության մյուս տեղամասերում։ Օրինակ, աշխատավարձը ժամանակին չստանալու կապակցությամբ երկաթգծի 84-րդ վերստի (Ալավերդու մոտ) թունելի վրա աշխատող խտավացի բանվորների մի խումբ 1898 թ. բողոք է ներկայացնում Կովկասի կառավարչապետ Գոլիցինին³⁰։

«Մշակ» թերթից տեղեկանում ենք այն գործադուլի մասին, որը տեղի է ունեցել 1899 թ. գարնանը՝ Կարսի մարզի Կաղզվանի աղահանքերում։ Բանվորները, որոնք աշխատում էին 12—14 ժամ և ստանում ընդամենը 40 կոպեկ օրավարձ, բողոքներով ու խնդրանքներով ոչ մի արդյունքի չեն հասնում։ Ուստի դիմելով գործադուլի, նրանք պահանջում են օրավարձն ավելացնել 10 կոպեկով և վերջ տալ վերակացուների ճնշումներին³¹։

Անշուշտ, արխիվային փաստաթղթերի ու ժամանակի պարբերական մամուլի նյութերի հետագա ուսումնասիրումը հետազոտողներին հնարավորություն կտա լրացնելու արևելահայ բանվորական շարժման սկզբնավորման պատմությունը։

Արևելյան Հայաստանի բանվորական այս առաջին գործադուլները³², չնայած իրենց փոքր մասշտաբներին, որոշակի դեր խաղացին բանվորների համախորժման ու կազմակերպման, նրանց դասակարգային ինքնագիտակցության ձևավորման գործում։ Այս առումով տեղին է նշել գործադուլային շարժմանը Վ. Ի. Լենինի տված գնահատականը. «Ամեն մի գործադուլ, որքան էլ չնչին լինեին նրա հետևանքները, տալիս էր ինչ-որ անգնահատելի, նոր, կարևոր, բովանդակալից բան...»³³։

Տնտեսական հողի վրա ծագած բանվորական այս առաջին ելույթները տարերային ու տեղային բնույթ էին կրում։ Դրանք թույլ էին ու անկազմակերպ և, որպես կանոն, դատապարտվում էին անհաջողության։ Բանվորները չունեին անհրաժեշտ փորձ ու ղեկավար կենտրոն, գործողությունների միասնական պլան, բացակայում էին պայքարի մասշտաբայնությունն ու հետևողականությունը։ Այլ կերպ չէր էլ կարող լինել, քանզի դրանք միայն առաջին քայլերն էին։ Այսուհանդերձ, բանվորական շարժման սկիզբը որակական նոր երևույթ

27 Նույն տեղում, թ. 24։

28 Վ. Ավետիսյան, նշվ. աշխ., էջ 39։

29 «Новое обозрение», 1898, № 4873.

30 ЦГИА Груз. ССР, ф. 12, оп. 1, д. 2343, л. 7.

31 «Մշակ», 1899, № 785.

32 Խ. Բարսեղյանը իրավացիորեն նշում է, որ «Краткая история рабочего движения в России» (М., 1962) աշխատության մեջ անտեսվել են Արևելյան Հայաստանի բանվորական այս շարժումները։ «Առհասարակ գրքի հեղինակները հստակ պատկերացում չունեն հայ պրոլետարիատի նախահոկոսների շրջանի պատմության մասին», — գրում է Խ. Բարսեղյանը («Մարքսիզմի տարածումը Հայաստանում», հ. 1, էջ 72)։

33 Վ. Ի. Լենին, ՆՆԺ, հ. 40, էջ 386։

էր մեր ժողովրդի հասարակական կյանքում, դա սկիզբն էր մեծ պայքարի, որն ուղի էր հարթում Արեւելյան Հայաստանում մարքսիզմի տարածման համար: Կապիտալիզմի դարգացումն Արեւելյան Հայաստանում ծնեց ամենահեղափոխական ուժը՝ բանվոր դասակարգին, որը շատ շուտով ձեռք էր մեկնելու գյուղացիական և աղգային-ազատագրական շարժումներին, դրանք դնելու էր միասնական հունի մեջ և գլխավորելու ինքնակալության դեմ ուղղված պայքարը:

КЛАССОВАЯ БОРЬБА ПРОЛЕТАРИАТА ВОСТОЧНОЙ АРМЕНИИ В 1890-х ГОДАХ

ВАЧЕ ОВАКИМЯН

Резюме

В 1890-х гг. промышленность в Восточной Армении была развита слабо, что налагало свой отпечаток на развитие рабочего движения. Лишь в меднорудной промышленности и на железной дороге пролетариат был относительно силен и организован, поэтому не случайно первые рабочие движения возникли на строительстве железнодорожной линии Тифлис—Александрополь—Карс. Рабочие движения, зародившиеся на экономической почве, носили локальный характер и, как правило, были из-за слабости обречены на неудачу. Пролетариат не имел необходимого опыта, руководства и плана совместных действий. Несмотря на скромные масштабы, первые рабочие забастовки в Восточной Армении сыграли определенную роль в сплочении и организации рабочих, формировании их классового самосознания. Начало рабочего движения было качественно новым явлением в общественной жизни края и создало благоприятные условия для распространения марксизма в Восточной Армении.